



Khutbah Jumaat Khas

PALESTIN JANTUNG UMMAH

20 Oktober 2023M/ 6 Rabi'ul Akhir 1445H

الْحَمْدُ لِلَّهِ الْقَائِلِ:

وَلَا تَحْسَبَنَّ الَّذِينَ قُتِلُوا فِي سَبِيلِ اللَّهِ أَمْوَاتًا بَلْ أَحْيَاءٌ عِنْدَ رَبِّهِمْ يُرْزَقُونَ ﴿١٦٩﴾ ﴿سورة آل عمران﴾
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى نَبِيِّنَا مُحَمَّدٍ وَعَلَى آلِهِ وَصَحْبِهِ وَمَنْ دَعَا بِدَعْوَتِهِ إِلَى يَوْمِ الدِّينِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ، أَوْصِيكُمْ وَنَفْسِي بِتَقْوَى اللَّهِ وَطَاعَتِهِ لَعَلَّكُمْ تُفْلِحُونَ.

SIDANG JUMAAT RAHIMAKUMULLAH,

Marilah kita meningkatkan ketakwaan kepada Allah **سُبْحَانَهُ وَتَعَالَى** dengan bersungguh-sungguh menyempurnakan perintah Allah dan bertekad sepenuh hati meninggalkan larangan-Nya. Mudah-mudahan dengan amalan yang dilaksanakan demi ketaatan selaku hamba Allah yang Maha Esa, kita memperoleh keredhaan di dunia serta dianugerahkan nikmat syurga di akhirat kelak.

Selain itu, khatib juga ingin mengingatkan sidang hadirin sekalian agar memberi fokus dan perhatian kepada khutbah Jumaat ini. Janganlah leka bermain gajet, tidur dengan sengaja, berbual-bual atau menggerakkan tabung

kutipan masjid kerana perbuatan-perbuatan tersebut bertentangan dengan adab mendengar khutbah.

Kita berkumpul pada Hari Jumaat yang diberkati ini untuk membincangkan isu yang tidak hanya membentuk sejarah Ummah tetapi juga masih menimbulkan kebimbangan dan kesedihan dalam hati kita. Ia adalah isu **Palestin**. Tanah yang dimuliakan dan kaya dengan sejarah para Nabi dan Rasul serta perjuangan jihad rakyatnya hingga ke saat ini. Marilah kita bersama-sama menghayati khutbah Jumaat yang akan mengangkat tajuk **“Palestin Jantung Ummah.”**

SIDANG JEMAAH YANG DIRAHMATI ALLAH,

Palestin kembali bermandi darah buat kesekian kalinya. Ketika khutbah ini ditulis, angka umat Islam yang terbunuh telah meningkat kepada 2,808 orang. Manakala 10,859 orang telah cedera dalam serangan udara rejim zionis Israel di Gaza dan angka-angka ini dijangka akan terus meningkat. Ribuan warga Palestin telah beransur-ansur melarikan diri meninggalkan kawasan utara Gaza. Hanya Allah **سُبْحَانَهُ وَتَعَالَى** sahaja yang Maha Mengetahui bilakah konflik ini akan berakhir dan umat Palestin diberikan kemenangan.

MUSLIMIN YANG DIRAHMATI ALLAH SEKALIAN,

Palestin merupakan tempat yang sungguh istimewa di hati umat Islam. Tempat lahirnya para Nabi dan Rasul. Tempat beradanya sebuah masjid yang mulia iaitu Masjid Al-Aqsa. Masjid di mana berlakunya peristiwa agung iaitu Peristiwa Israk dan Mikraj. Kisah ini dirakamkan dalam Al-Quran melalui Surah Al-Isra' ayat 1:

سُبْحَنَ الَّذِي أَسْرَى بِعَبْدِهِ لَيْلًا مِّنَ الْمَسْجِدِ الْحَرَامِ إِلَى الْمَسْجِدِ الْأَقْصَا الَّذِي بَرَكْنَا
حَوْلَهُ لِنُرِيَهُ مِنْ ءَايَاتِنَا إِنَّهُ هُوَ السَّمِيعُ الْبَصِيرُ ﴿١﴾

Maksudnya: “Maha suci Allah yang telah menjalankan hamba-Nya (Muhammad) pada suatu malam dari Masjidilharam (di Mekah) ke Masjid al-Aqsa (di Palestin) yang telah Kami berkati sekelilingnya agar Kami perlihatkan kepadanya sebahagian daripada tanda-tanda (kekuasaan dan kebesaran) Kami. Sesungguhnya Dialah Yang Maha Mendengar lagi Maha Melihat.”

Syeikh Wahbah al-Zuhaili di dalam Tafsir Al-Munir menyatakan bahawa Masjid Al-Aqsa ini adalah Baitul Maqdis. Dinamakan Masjid Al-Aqsa adalah disebabkan jaraknya yang jauh daripada Masjidil Haram. Manakala Syed Qutub dalam Tafsir Fi Zilal Al-Quran menyatakan bahawa Masjid Al-Aqsa adalah tempat perhentian perjalanan peristiwa Israk. Ia juga merupakan jantung tanah suci di mana Allah telah menjadikannya sebagai tempat kediaman Bani Israel kemudian mengusir mereka keluar darinya.

Kemuliaan Masjid Al-Aqsa ini juga disebut dalam sebuah hadis daripada Abu Zar رَضِيَ اللَّهُ عَنْهُ, bahawa Nabi صَلَّى اللَّهُ عَلَيْهِ وَسَلَّمَ bersabda:

“Kami sedang mengingati antara satu sama lain dan Rasulullah صَلَّى اللَّهُ عَلَيْهِ وَسَلَّمَ berada di sisi kami berkaitan yang mana lebih afdhal di antara masjid Nabi dan juga Masjid Baitul Maqdis. Maka Rasulullah bersabda: “Solat di masjidku ini lebih afdhal daripada empat kali solat di Baitul Maqdis. Alangkah nikmatnya bagi orang yang solat. Sesungguhnya akan tiba satu masa, seseorang itu memiliki tanah seukuran tali kuda sehingga dia mampu melihat Baitul Maqdis. Hal itu adalah lebih baik baginya daripada dunia keseluruhannya atau lebih baik daripada dunia dan seisinya.”

SIDANG JUMAAT YANG DIRAHMATI ALLAH SEKALIAN,

Kemuliaan bumi Palestin kini telah pun tercemar sejak penubuhan negara Israel pada 15 Mei 1948. Ia adalah hasil daripada idea Theodor Herzl, seorang pemimpin Gerakan Zionis Antarabangsa yang inginkan sebuah negara untuk bangsa Yahudi.

Keamanan yang dikecapi oleh umat Islam di Palestin telah dirampas dengan kejam. Lihat sahaja apa yang telah berlaku di Perkampungan Deir Yasin, Baitul Maqdis. Seramai 245 orang penduduk telah dibunuh tanpa perasaan belas kasihan. Mangsa-mangsa disembelih, dipotong anggota badan mereka serta dirogol. Mereka yang terselamat diarak di sepanjang kawasan kejiranan Yahudi sebelum dibunuh. Israel telah berjaya mengusir penduduk Palestin di Baitul Maqdis dan menguasai lebih 80% kawasan terbabit pada waktu tersebut.

Tidak cukup sekadar itu. Kekejaman zionis Israel berterusan dengan peristiwa pembunuhan di Kem Pelarian Syabra dan Shatilla, Lubnan yang berlaku pada 16 September 1982. Mereka telah melakukan kekejaman dengan merogol, merosakkan dan membunuh seramai 3,500 orang awam Palestin dan Lubnan. Kebanyakannya adalah wanita, kanak-kanak, dan orang tua. Beberapa tahun yang lepas, rejim zionis Israel telah merampas tanah dan hak milik rakyat Palestin di perkampungan Syekh Jarrah. Bayangkan sekiranya rumah dan tanah yang kita duduki turun temurun telah dirampas begitu sahaja oleh pendatang asing. Bagaimanakan perasaan kita ketika itu? Apakah tindakan yang akan kita ambil?

Begitulah keadaan rakyat Palestin yang saban hari dan waktu dizalimi, dibunuh dan ditekan oleh zionis Israel. Maka, tidak hairanlah jika apa yang dilakukan oleh HAMAS dalam melakukan Penentangan Taufan Al-Aqsa adalah sebagai tindak balas kekejaman dan kezaliman yang dilakukan rejim zionis Israel selama ini.

MUSLIMIN RAHIMAKUMULLAH,

Yakinlah kita bahawa, kemenangan buat umat Islam di Palestin semakin hampir.

As-Syahid Syeikh Ahmad Yaasin, pengasas pergerakan HAMAS, pernah memberitahu wartawan ketika ditemuramah bahawa Palestin akan dibebaskan pada tahun 2027. Beliau menyatakan bahawa Al-Quran telah membicarakan generasi-generasi bertukar pada setiap 40 tahun.

Dalam 40 tahun pertama di Palestin, telah berlaku peristiwa An-Nakbah. Kemudian 40 tahun kedua, telah bermula intifadhah, konfrontasi, halangan-halangan, peperangan dan pertembungan senjata api. Seterusnya dalam 40 tahun ketiga, ia semua akan berakhir dengan izin Allah Taala.

Ini adalah berdasarkan bacaan peristiwa dengan panduan Al-Quran. Kenapa Allah **سُبْحَانَهُ وَتَعَالَى** telah menyebabkan Bani Israel tersesat di Semenanjung Saina selama 40 tahun? Ini kerana Allah hendak menggantikan generasi yang telah sakit dan rosak dengan generasi yang berjuang. Generasi Nakbah yang awal telah pun pergi. Kemudian, digantikan dengan generasi pejuang dan berjihad mengangkat senjata. Generasi ketiga nanti adalah generasi yang akan membebaskan tanah air Palestin, dengan izin Allah.

Begitulah semangat perjuangan yang diungkapkan oleh Syeikh Ahmad Yassin, seorang pejuang Palestin yang sangat digeruni rejim zionis Israel yang akhirnya bergelar syahid.

SIDANG JUMAAT YANG DIMULIAKAN,

Allah SWT berfirman dalam Surah Al-Baqarah ayat 154:

وَلَا تَقُولُوا لِمَن يُقْتَلُ فِي سَبِيلِ اللَّهِ أَمُوتٌ ۚ بَلْ أَحْيَاءٌ وَلَكِن لَّا تَشْعُرُونَ ﴿١٥٤﴾

Maksudnya: *“Dan janganlah kamu mengatakan orang yang gugur terbunuh dalam perjuangan membela agama Allah (bahawa mereka itu) mati. Bahkan sebenarnya mereka itu hidup (dengan keadaan hidup yang istimewa) tetapi kamu tidak menyedarinya.”*

Jika kita lihat daripada perkembangan persenjataan mujahidin terutama Briged As-Syahid Izzuddin Al-Qassam, telah banyak kemajuan yang mereka capai. Antaranya pelancaran roket yang boleh menjangkau sehingga 250 km ke bandar-bandar Israel, skuad amfibia yang boleh menyusup masuk ke negara Israel melalui jalan laut, roket yang boleh memintas iron dome Israel dan sebagainya. Kesemua ini berjaya dihasilkan walaupun dengan segala sekatan dan halangan yang dikenakan oleh regim zionis Israel serta sekutu-sekutunya kepada warga Palestin.

Ambillah semangat dan contoh peristiwa kemenangan Rasulullah ﷺ dalam peristiwa pengusiran golongan Yahudi Bani Nadhir dari Madinah. Ia disebabkan oleh penghianatan mereka terhadap Piagam Madinah dan telah membocorkan rahsia kekuatan Islam di Madinah kepada kaum Quraisy. Mereka juga secara terang-terangan membunuh dan menyakiti kaum

muslimin serta melakukan percubaan pembunuhan terhadap Nabi Muhammad ﷺ. Tentera muslimin di bawah pimpinan Rasulullah melakukan pengepungan terhadap Bani Nadhir selama enam hari. Akhirnya, mereka menyatakan kekalahan kepada pasukan Islam dan mereka telah diusir keluar daripada Madinah.

MUSLIMIN YANG DIKASIHI ALLAH,

Maka apakah peranan yang boleh kita mainkan dalam membantu umat Islam Palestin? Di sini khatib ingin memberi beberapa saranan yang boleh dilaksanakan, antaranya:

Pertama: Kempen boikot produk keluaran Israel dan sekutunya secara besar-besaran. Walaupun kempen sebegini dilihat lebih bersifat bermusim, namun sekiranya ia digerakkan secara berstrategi dan menyeluruh, pastinya memberi kesan lebih kuat. Strategi pemboikotan yang bersasar, mampu melumpuhkan ekonomi konglomerat Israel, sekali gus menghapuskan penguasaan ekonomi mereka.

Kedua: Kempen melalui media sosial. Sememangnya media sosial utama dunia dikuasai Israel seperti Twitter, Instagram dan Facebook, namun dengan kekuatan solidariti umat Islam berjumlah 1.9 billion ini, ia mampu menggegarkan dunia serta mendedahkan kezaliman zionis Israel kepada penduduk Palestin.

Ketiga: Penyaluran dana kewangan. Umat Islam wajib menyalurkan bantuan semampu mungkin kepada badan yang menguruskan sumbangan terus kepada pejuang Palestin.

Keempat: Momentum solidariti kebajikan umat Islam perlu digerakkan sepenuhnya di seluruh dunia bagi membantu rakyat Palestin. Tahniah kepada

Kerajaan Negeri Pulau Pinang yang turut melancarkan Himpunan Solidariti untuk Palestin sebagai tanda solidariti kepada umat Islam Palestin.

Kelima: Memanfaatkan doa setulus ikhlas dan bermunajat kepada Allah **سُبْحَانَهُ وَتَعَالَى** Yang Maha Perkasa untuk membantu perjuangan Mujahidin di Palestin. Doa adalah senjata bagi orang Mukmin. Umat Islam juga diseru melazimi Qunut Nazilah dalam setiap solat agar Allah memberikan kekuatan dan kemenangan kepada perjuangan Islam di Palestin.

SIDANG JUMAAT YANG DIMULIAKAN,

Mengakhiri khutbah, marilah kita bersama-sama menzahirkan keprihatinan dalam isu Palestin ini. Ambillah peranan semaksimum mungkin dalam membantu saudara kita di sana.

Firman Allah **سُبْحَانَهُ وَتَعَالَى** dalam Surah Al-Isra' ayat 7:

إِنْ أَحْسَنْتُمْ أَحْسَنْتُمْ لِأَنْفُسِكُمْ وَإِنْ أَسَأْتُمْ فَلَهَا فَإِذَا جَاءَ وَعْدُ الْآخِرَةِ لِيَسُوءُوا وُجُوهَكُمْ
وَلِيَدْخُلُوا الْمَسْجِدَ كَمَا دَخَلُوهُ أَوَّلَ مَرَّةٍ وَلِيُتَبِّرُوا مَا عَلَوْا تَتْبِيرًا ﴿٧﴾

Maksudnya: “Jika kamu berbuat baik(maka faedah) kebaikan yang kamu lakukan itu adalah untuk diri kamu sendiri. Dan jika kamu berbuat jahat, maka (kesannya yang buruk) itu bagi diri kamu sendiri dan apabila datang saat hukuman bagi (membalas perbuatan derhaka kamu) yang kedua, (Kami bangkitkan musuh kamu) untuk menyuramkan wajah kamu (dengan penghinaan dan keganasannya), lalu mereka masuk ke dalam masjid (Masjid al-Aqsa), sebagaimana ketika mereka memasukinya pertama kali dan mereka

membinasakan apa-apa sahaja yang dikuasai mereka dengan sehancur-hancurnya.”

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ، أَقُولُ مَا
سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ، إِنَّهُ هُوَ
الْغَفُورُ الرَّحِيمُ.



Khutbah Kedua Bulan Oktober

2023M/ 1445H

الْحَمْدُ لِلَّهِ عَلَى أَلَانِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ، وَزِينَةَ
عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

[الأحزاب: 56]

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ نَبِيِّ الْبَشِيرِ النَّذِيرِ، وَالسَّرَاجِ الْمُنِيرِ، وَارْضَ
اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى يَوْمِ الدِّينِ،
وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Khatib juga mengambil kesempatan ini untuk menyeru para jemaah
sekalian agar terus memberikan sokongan padu tanpa berbelah-bagi kepada
penduduk Palestin yang sedang dizalimi oleh Regim Zionis melalui serangan
tanpa henti di Gaza dan Tebing Barat.

Kita mungkin tidak mampu mengangkat senjata, tetapi kita masih
mempunyai kekuatan daripada aspek kewangan. Infakkanlah sebahagian
rezeki untuk membantu mereka yang ketika ini berada dalam keadaan yang



amat menyedihkan serta menjalani kehidupan yang sukar. Selain itu, gunakanlah senjata paling ampuh yakni DOA. Semoga Allah سُبْحَانَهُ وَتَعَالَى menganugerahkan kejayaan, keselamatan dan kesejahteraan buat seluruh umat Islam serta rakyat Palestin khususnya. Semoga bumi Palestin kembali aman dan makmur di bawah rahmat Allah سُبْحَانَهُ وَتَعَالَى.

اللَّهُمَّ أَعِزَّ الْإِسْلَامَ وَالْمُسْلِمِينَ، اللَّهُمَّ أَذِلَّ الشُّرَكَ وَالْمُشْرِكِينَ، اللَّهُمَّ انصُرْ إِخْوَانَنَا
الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلِسْطِينَ وَفِي كُلِّ مَكَانٍ وَفِي كُلِّ زَمَانٍ.

Ya Allah! Muliakan Islam dan orang Islam. Ya Allah! Hinakan Syirik dan musyrikin. Ya Allah! Berilah pertolongan kepada saudara-saudara kami yang muslim, para mujahidin dan golongan-golongan yang lemah di Palestine dan juga di semua tempat dan setiap ketika.”

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ صَالِحِينَ
مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ الْفِتَنِ
مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ
الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠١﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ عَلَى نِعَمِهِ
يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٠٢﴾

